

四庫全書

史部

欽定四庫全書

平定兩金川方略卷一百六
史部

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷一百六

九月辛未阿桂豐升額色布騰巴爾珠爾奏言查
遜克爾宗礮寨牆垣堅厚自用礮轟擊以來上半
雖多坍塌而下半尚為鞏固其西南一面亦未甚
頽壞且自八月以來雨雪連綿即九月初間雖有
一兩日之晴仍復大雪積至數寸至初六日夜始
行開霽臣等查看遜克爾宗官寨賊人死守堅拒

必須設法進攻當派令海蘭察額森特分隊帶兵
于初七日寅刻前進賊人放鎗拋石極力抵禦相
持數刻遂令官兵明為撤下而密留勇銳兵二百
名潛伏于寨旁灌木蒙茸之內使賊無由知覺以
為我兵已撤意稍懈弛庶可突然搶佔比及辰刻
埋伏各兵從灌木中突出奮躍而前即于轟坍之
所直上寨牆賊人出其不意一面放鎗一面于硯
寨之內拋石擊打勢如風雨其寨牆之根賊本挖

有孔穴亦于此持矛外戳並放鎗外擊以禦接續
上牆之兵惟寨牆坍處在寨外視之似已離地無
多而于寨內視之則去地尚有二丈各兵雖上寨
牆尚難跳越而下因即騎在牆上見有露身拋石
打鎗之賊儘力擊射鎗箭所及幾無虛發攻至未
刻已歷三時各處山寨之賊均來應援鎗石更緊
又將木果木所得之噴筒向上施放恐多傷損徐
徐酌撤臣等公同商議此次進攻所以未能得手

實因臣等心急如焚一趨天晴即思攻克不及俟至寨牆下截再多摧燬是以官兵未能下牆入寨但殺賊約五六十人而救援之賊為鎗箭所斃尤多其在寨內牆根孔穴間堵禦之賊所有鳥鎗長矛多被我兵奪獲賊人實為喪氣若乘此再奮力上攻必難支禦因于初八九兩日又將各種礮位合力施攻初九日夜復派令海蘭察泰斐英阿等分隊進攻並令排列礮位視無碍官兵之處併力

轟推至初十日黎明各隊官兵一同進發而賊人
狡惡異常因寨牆所塌之土石堆積牆下已成漫
坡即于漫坡中間另挖溝濠一道以限官兵前進
其溝沿之上悉遮木植板片以禦官兵擊射又將
石塊堆在寨牆之上俟官兵逼至牆根力推而
下勢如雨點連撲三次不能攻進但賊于官兵逼
近之際不得不露身抵禦而官兵鎗箭臣等本擇
滿洲索倫中技藝最好之人是以發無不中而礮

子所擊斃賊亦為不少又烏什哈達福康安等攻打西北寨落時有賊數十人從溝底潛來思欲截後烏什哈達等分兵下壓殲斃及帶箭滾崖者又有十餘名至我官兵兩日攻撲初七日護軍校烏爾袞泰陣亡二等侍衛庫爾德副將烏爾納護軍校德布陞額有鎗石微傷初十日海蘭察因賊鎗打在石上回迸左頰稍有浮腫額森特亦被石擦傷鼻又中大腿普爾普為賊小箭所傷均無妨碍

行走如常其副參領巴圖魯興奎先于初七日石
傷腰脊初十日仍復賈勇先登石傷臉面又頸等
侍衛巴圖魯佛倫泰亦兩日皆受石傷幸俱不重
至初七日首上寨牆之兵共有九名臣等各賞銀
牌銀兩以示鼓勵查遜克爾宗實係賊人隘口是
以各領隊等無不盡之心各官兵等無不盡之力
如此攻撲而賊人衛巢護死守拒彌堅臣等現在
另行設法籌辦務為即克之計再初五日傍晚有

日爾巴當噶之賊百餘假作土兵之狀從得斯東
前來突犯從噶克土兵營卡經叅將曹順看出督
同擊打傷斃數人其餘竄入箐林而逸又大營對
過之南山卓克采土兵營卡賊于初六日夜半
復來侵擾守卡土兵施鎗抵禦經守備路連英聞
聲應援黑夜攪殺斃賊數名亦潛逃竄土兵內亦
有陣亡者隨令別思滿三等侍衛穆塔爾鄂克什
土都司賡噶帶領土兵尋踪追勦斃賊數名割取

耳記呈獻查賊人當此窘迫之時惟恐露其畏怯之狀尚思多方滋擾深堪切齒然一見官兵無不敗北而去則其伎倆更已可見臣等嚴飭營卡愈加防範如賊自來送死務須多為截殺以洩忿恨奏入

上諭軍機大臣曰據阿桂等奏連日攻打遜克爾宗殺戮多賊情形一摺將領及兵丁等連次攻碉均各奮勉出力鼓勇先登深堪嘉獎將士如此齊心必邀

上天嘉佑可期迅速成功至阿桂等於官兵進攻時見有
履險難進之勢徐徐酌撤自應如此辦理看來賊衆
抗拒情形窘迫自救已無能為只要天氣晴霽便可
得手番地氣候十月以後晴霽日多轉瞬即屬孟冬
自可即期克捷佇聽喜音

同日文綬奏言臣查各省官兵所用皮衣如陝甘
雲貴等省向俱由各該省置辦解送軍營散給川
省兵丁衣裝亦由各該營自行解送惟楚兵衣服

去年准署督臣陳輝祖借項解川代為製辦惟時該兵等皮棉衣服均先在川省借項辦解即于楚省借到項內照扣歸款前准陳輝祖咨商以叅贊富德咨取楚兵衣履可否仍照上年撥餉解川辦理等情移咨前來臣以輾轉咨詢恐需時日應飭令官兵將領核明各兵需用衣履在川借項辦解咨明陳輝祖并已知會軍營茲奉

聖諭臣即飛咨各路軍營一俟將軍叅贊等酌定行知

到日凡有應添裝械等項即行墊項照辦迅解軍
營知會該省扣解歸款至上年陝甘兩省辦解皮
衣因解到之時川省已經趕辦齊全貯存未用前
經將軍阿桂咨取當將甘省皮衣挑取四千六百
件解往應用並經奏明在案其散給何項兵丁臣
並未指定現候軍營造冊咨會到日分別咨行扣
還其南路已准副將軍明亮覆到無須解送現在
成都尚存陝西省皮衣五千件先經臣咨詢將軍

阿桂等總候覆到照辦奏入

上諭軍機大臣曰前因陳輝祖奏楚兵應需皮衣等項請借一季俸餉解川製給朕以軍營如雲貴陝甘各省兵甚多若各顧其士卒未為公當必須畫一辦理方為妥協茲據文綬奏上年陝甘兩省亦早有辦理皮衣之例則不獨楚省一處為然自可照陳輝祖所奏辦理現在明亮處既覆到無須解送著傳諭文綬速行咨詢阿桂富德在營楚省兵丁如有需用皮衣

之處即一面迅速辦理一面咨會陳輝祖撥餉解川
歸款

同日桂林奏言查僧格宗一帶營卡自歸併河南
以來防兵皆據險要復有溜急河流以限南北迄
今數月賊人並不敢少形窺伺但山形之扼要固
可常憑而水勢則變遷靡定當隨其消長以為籌
計現屆秋深河水日消查河南之馬爾里榮寨暨
達實喜之迤東等處現在水勢間有平行可用皮

船徑渡併淺落至二尺許可以徒涉而過者此一
帶沿河地面自榮寨以西俱與河北之科多日古
嚕溝僧格宗隔河緊對其達實喜以東則皆係供
運防兵口糧之路自應嚴防以昭慎密臣嚴飭各
營將備即將各處河邊要口築砌碉座晝夜瞭望
倘賊匪冒死潛渡即可乘其將涉之頃盡行殲斃
再河南兵米向因策爾丹色木一帶河水洶湧皆
紆道運至紉木覺爾宗始用船濟渡而南今策爾

丹色木與納木覺爾宗下游既皆於淺水處對河築有碇座即可於此兩處各依碇座之下浮搭木橋使兵米悉由河南山根行走不惟運道較前便捷而所過浮橋責令駐碇弁兵于背運人等經由之後即將木板抽撤并可于保護之中寓稽防之道至策爾丹色木附近之得里山溝其路直通當噶尔拉防範最宜加嚴且該處距納木覺爾宗不遠亦為後路往來適中之地而現在防兵口糧復

改由策爾丹色木搭橋輓運以目下情形而論彈
壓控制視他處尤為緊要臣已派侍郎副將移駐
策爾丹色木併抽添漢土兵一百名以壯聲威斷
不稍致疎懈奏入

上是之

同日富勒渾鄂寶劉秉恬奏言臣等查勘沿塗米
石現已隨行均無停積當即同至揪砥籌商糧運
事宜適臣鄂寶因綽斯甲布軍糧緊急雖令各站

採辦青稞炒麵並購買羊隻以備搭放但地處蠻荒採辦究屬無多未足深恃是以馳赴各站查催長短各運米石於九月初八日亦至楸砥會合查近日滾運騾運以及長運之米每日到站過站者約有一千餘石較前已漸有起色臣等悉心籌計西路軍營官兵及附營各站人夫每日約需米六百餘石北路軍營每日約需米三百餘石目下兩路軍營附近雖尚存米各二三千石必須逐日照

數運供方可保無缺乏現除大板昭梭落栢古卓
克采三處長運米不計外每日滾運西路之米擬
以五百石為率滾運北路之米擬以二百五十石
為率如果後運之米接踵而至足供每日分發滾
運加以長運則西北兩路軍糧自可日就充盈惟
查揪砥一站額設站夫八百名分運兩路軍需今
滾運之米數驟增則夫力未免竭蹶臣富勒渾臣
劉秉恬飛飭軍需局添派人夫八百名給發該站

聽用如此項人夫一時未能抵站即著該站糧員就近雇募蠻人客夫應用所需安家銀兩暨逐日工價口糧俱准其照內地人夫之例給發如此辦理可期迅速茲復于初六日接准文綬咨送摺稿派令潼順嘉資綿眉六府州屬辦米六萬石滾運楸砥其自楸砥至大板昭一帶亦應酌添夫力接續趕運已飭軍需局撥夫送往備用臣等查內地出口之米始辦驟運繼議夫運今復籌添滾運自

係救急之方但恐承辦各員恃有滾運或將原派各項米石懈于轉運仍不免有顧此失彼之慮臣等督率各員分段催趲不致稍有停滯務使軍糧迅速通行用資儲備奏入

上諭軍機大臣曰富勒渾等會奏在楸砥查近日糧運到站過站者約有千餘石較前已漸有起色但恐內地稍有懈緩仍不免顧此失彼之語著傳諭文綬即嚴飭各糧員速將應運各項米石上緊趕運並責成

督催各大員沿途往來嚴催務須按日到站不致稍有延緩以裕軍食文綬錢鏐亦當上緊嚴催毋干重戾

同日阿桂豐昇額色布騰巴爾珠爾奏言臣等於九月初七日攻取遜克爾宗先于初六日夜派三等侍衛巴達瑪黑龍江協領那延泰帶兵二百名前往乃初七日早海蘭察額森特領兵已至賊寨而巴達瑪那延泰未到及經海蘭察責備伊等轉

舉動傲慢並不心服臣等思侍衛雖非領隊大臣
管轄而當攻戰時派在何隊則無論侍衛章京俱
應聽領隊大臣約束指使今巴達瑪等臨陣既退
縮不前又不服管轄殊屬不堪請

旨將巴達瑪那延泰革職令其披甲効力贖罪奏入
上諭曰巴達瑪那延泰僅予革職不足示懲著鞭責一
百披甲効力贖罪嗣後如仍不知奮勉阿桂等即行
叅奏從重治罪

癸酉

上諭軍機大臣曰前日阿桂奏官兵攻遜克爾宗情形只須晴霽數日便可得手番地冬令雨雪較少現在將次交冬可冀天氣多晴尅期集事亟望捷音設或賊人勢處窮蹙死守愈力急切未能攻下又不宜為株守之計因思日爾巴當噶為必須攻取之地前據阿桂奏可由凱立葉下壓何不令豐昇額帶兵數千馳赴凱立葉與五岱合力攻壓日爾巴當噶若經攻

得則遜克爾宗可以兩面夾擊賊必不能久聚似亦
出奇制勝之一策阿桂等以為何如此旨到後如遜
克爾宗已經攻得自屬甚善倘尚需時日此法是否
可行著阿桂等即悉心妥酌辦理具奏

臣等謹案兵法相地必先扼要故善攻者敵不
知所守日爾巴當噶本凱立葉賊人後路與宜
喜日旁聲勢聯絡西接金川大河從山而下并
可截穆爾津岡之後若與五岱官軍合力攻壓

則扼奇制勝勢如建瓴而丹壩官軍亦遙應矣
但其地峯崖陡峻林莽叢深且冰雪凝沍番人
亦未嘗取道于此是以臣阿桂計議及之未敢
輕決進取也我

皇上燭微知顯以賊兵既出死力固守遜克爾宗則無
暇更顧日爾巴當噶後路因而披圖決策即令
於此出奇由是得所稟承分兵潛上賊人瓦散
金川要害已得進逼勒烏圍巢穴遂成席捲之

勢矣

丙子

上諭內閣曰川省自征勦金川以來一切供頓俱係動撥帑金至運送軍糧需用夫役亦俱給以安家口糧等項而跋涉負戴究不免稍資民力該處羣黎咸知踴躍奉公深可嘉尚是以疊次加恩將乾隆四十年以前該省應徵錢糧分別緩帶今大功指日告成官軍正當乘勝深入之際糧運軍儲加緊趲運所需夫

役倍多朕心深為軫念所有川省節年已經緩徵錢糧此時雖暫緩催科將來仍須如數完納民力不無拮据允宜更沛渥恩用昭優恤著該督等即將川省辦差出夫各屬乾隆三十九年以前已緩錢糧內分別差務繁簡多寡或應全行蠲免或量予蠲免一半及酌減十分之幾速行妥議覆奏候朕降旨加恩俾閭閻勤于趨事生計益得寬舒其夷民有認納夷賦銀米貢馬者均著一體查明辦理以副朕嘉惠勞民

有加無已至意其四十年分緩征錢糧統俟大臣奏捷時候朕另降恩旨該部遵諭速旨

丁丑明亮舒常奏言查木克什山腿下接三碉用礮轟摧日見頽破而賊總于地窖藏身悉力固守正以對面山梁地名格木勺其上修有戰碉四座望見我兵稍有舉動即將甲索下援之賊全聚於此互為犄角臣等察看情形實足為肘腋之患十三日天氣放晴派令侍衛阿滿泰等分路進攻以

截甲索賊人來路一面即將木克什以下三碉派令珠爾格德等帶兵攻打十四日將及黎明各兵俱到碉下四面合圍其格木勺山梁四碉俱係仰攻本難得手惟有牽綴賊勢使之不能他顧而木克什各碉內同時放鎗拋石如雨其右手及在後兩碉已為阿爾都珠爾格德先後奪取其左手一碉和隆武前往接應而溝內約有賊番二三百人上前接戰甲索亦有賊番百餘壓至格木勺山梁

為夾攻之計官兵正與力戰相持臣等量溝內賊人不過就西南山腿各卡抽來救應彼處守禦必疎隨密令馬彪等向木克什一面趕立木城賊恐西南山腿有失方從木克什紛紛竄去而甲索一路賊人亦即敗退然相持已至申酉之間其右手及後兩礮內經攻得而左手賊礮從中可截恐昏黑之後難以存住即將兩礮折毀官兵以漸撤回計此次進勦割取首級二十顆耳記十五件生擒

活口三名其首級內尚有紅衣賊目二名實足以奪其魄而褫其膽所有兵丁傷亡數目現飭各營查報同陣亡之湖廣參將常保雲南守備王攀龍照例咨部其三寶阿爾都及侍衛七格委署參領寧勒寶委署防禦巴圖協領成德佐領京武里遊擊崔文傑都司常懷義守備福克津羅禮受傷俱屬無妨再協領成德自乾隆三十六年派赴南路出兵遇有打仗無不奮勉自効前于正月內攻克

斯第博堵即身帶鎗傷此次派攻木克什右手一
礮首先撲進以致左膀被鎗傷骨實屬奮勉出色

臣等謹將

皇上備賞花翎給與頂戴以示鼓勵奏入報

聞

同日桂林奏言查達爾圖軍糧既有北路正運復
添以南路之協運彼此交輸固可無虞缺乏第查
南路由打箭爐運往該處俱係蠻方曠野向難安

設臺站勢不得不雇烏拉長運而烏拉多係牛隻其行走本是遲緩且領米之後須用牛皮將米袋包裹縫紉以備野宿雨淋復以塗繞荒山又須結夥同行不無牽前等後既經起運一遇水草佳處又須稍為休息是以輾轉稽遲今查初次撥發吉地米石約全運到其續撥打箭爐米一萬六千雖據該處同知具報于八月內起運完竣但自打箭爐以至木池程站較遠中間如噶爾塔爾資隆一

帶尤為烏拉就草歇宿之處更恐多有淹留倘催辦未盡得宜轉盼冰雪載塗勢將中道阻滯臣商令臬司李世傑於本月十五日帶領妥幹員弁以及土目人等星赴噶爾塔爾等處將沿塗經過米石悉行趲運其資隆以前即係綽斯甲布之地臣并行知布政使司顏希深及知府盛英亦即專派幹員接催趲運如此兩路查催自可按期運竣而軍儲不致有虞缺乏矣奏入

上是之

同日郝碩奏言查鑼局銅觔一項只存八千餘觔
隨經連次札催軍需局及令灌縣銅觔作速趕運
並專差弁員沿途催運嗣據灌縣稟稱已於八月
十四日起解又據文綬札稱省局解辦銅觔物料
於十六日業已啟行今於九月初七日已運到銅
七千餘觔其銅觔自可以接踵而至又准文綬飭
局辦熟銅二萬觔趕運軍營更可無虞缺乏再查

底木達所運到鐵觔陸續運供頭敵外所存無幾
臣復商同富勒渾將上年存貯資哩生鐵十餘萬
觔由別思滿一路趕運礮局備用查軍營施放礮
子每日用鐵甚多仍恐此項鐵觔不敷應用又稟
請文綬並咨軍需局採辦生鐵十萬觔隨後趕運
自可源源接濟至於礮局需用物料已屢次咨局
解辦而白土尤關緊要詢之礮匠據云去歲卧龍
關一帶運出白土甚多各站不無餘剩隨札知原

任川北道吳文煌就近搜查轉運前來茲據吳文煌來札現尋出白土一千四百餘觔已於九月初十日運到是現在銅鐵及緊要礮料儘可敷用奏入報

聞

同日富勒渾郝碩奏言臣富勒渾於拜摺後自楸砥起程沿途催趲軍糧各站並無停滯惟山脚站前隔日爾拈雪山後運之米一時湧集而來站夫

背運跋涉維艱不無停積臣富勒渾隨于附近之大岩窩沙壩兩站各撥人夫二百名前赴山脚協同該站加緊運行務即掃數前進並咨明劉秉恬將西路換班人夫酌量裁撥該站以資應用十二日回至大班昭查核軍營各站報單存米尚有二千餘石每日長運滾運約有五百餘石足敷支應其揪砥存米一千四百餘石亦飭該站員等儘數發運用資接濟惟查西北兩路軍糧統計每日需

一千餘石現今趕運之糧多係滾運滾運多則夫數益增夫數增則口糧愈耗且米石輻輳而來各站於額夫之外加倍雇募蠻夫客夫極力趕運尚不敷用更加一切軍裝軍火銅鐵礮料一時合併運供沿途難於停滯是必須出口之米長短兼行俾站夫得以稍就從容方不致顧此失彼現咨明文綬速將原派各項米石嚴催僭運外查臣等前派雅安天全蘆山等州縣由木坪一路轉運之米

現據該員等稟報已於八月二十八日陸續起運米三千餘石該處餉道業已通行現在南路需米無多正可及時趕運西路協濟臣等復飛飭該州縣等再行加辦米一萬石與前派之七千石接續轉輸俾西路各站夫力得以稍有寬餘使北路軍糧早資儲備指日大功告成即將此項米石截留達木巴宗等處作為凱旋之用奏入

上是之

同日文綬奏言川省當秋成之後應乘時採買米石以備冬季軍糧且大功已屆垂成而辦理善後諸務經費浩繁仰懇

聖恩再撥銀四百萬兩以資供備庶儲峙益覺寬裕奏入

上諭內閣曰著照所請交戶部即於附近四川省分撥銀四百萬兩迅速解運川省備用其作何分起趕運之處並著該部速議具奏

已卯五岱奏言據副都統書麟等報稱九月十一
日夜有賊二百餘名潛擾莫爾敏山營卡千總嚴
倫領雜谷兵一千名接戰殺賊多人賊不能支放
鎗而遁嚴倫向後追殺賊復回身接戰嚴倫連殺
賊四五名而臂股受傷十一處猶鏖戰不已都司
袁敏聞有鎗聲領兵二百名來援賊衆即拖尸負
傷而竄袁敏引兵追殺用鎗傷斃賊人數名而腰
腿亦受石傷又據書麟等報本月十三日夜賊二

百餘名來侵達爾扎克北山溝營卡前鋒校德興
領兵接戰殺賊二十餘名賊人推倒木柵全集營
門意欲砍門擁入經德興等當門拒戰而官兵各
自奮勇放鎗不及即用腰刀長鎗斫截又殺賊十
餘人餘衆始潰而散德興自後追殺頭上亦受鎗
傷一處所有陣亡受傷官兵照例造冊送部奏入
上諭軍機大臣曰五岱奏賊衆夜衝莫爾敏山等處營
卡官兵俱各奮勇擊殺嚴倫著補授守備袁敏德興

侯有應陞之缺即行陞補兵丁各賞給一月錢糧因
思此際大兵深入賊衆尚時來侵擾哨卡此即其勢
窮計竭之驗將軍阿桂等後路關係甚重五岱務期
盡心防禦不使稍有妨碍

庚辰阿桂豐昇額色布騰巴爾珠爾奏言遜克爾
宗官寨其左隔有河溝崖礮壁立官兵斷難越溝
前進其官寨之右西北雖有寨落四座若將坡礮
層疊之處繞越斫開小路下一層坡礮即豎一層

木柵得此便可往斷賊人後路但逼近賊寨賊鎗甚密因於昏夜之中令兵丁各持柴捆遮身前進豎立柴捆後趕放土袋復於土袋內刨溝立寨一柵既定隨將礮位運往轟摧一兩日間漸已頽燬即令額森特烏什哈達于十五日黎明突然進撲賊亦滾石放鎗抵禦而各官兵人人憤怒四面齊上賊不能支分頭竄逸而臣等預派滿洲索倫勁兵埋伏注矢以待奮追攢射共斃二十餘名遂將

第一寨克取一面又往下接拏木寨移礮往轟第
二三寨伏思賊人衛死護巢雖無所不用其極但
此四寨中已奪其一而第二三寨漸被轟殘不過
此二三日內可以一併搶佔其第四寨即在榮噶
爾博河岸之旁得二三寨則第四寨亦歸掌握雖
遜克爾宗官寨後又有兩礮相護然相度地勢尚
屬攻取非難一經官兵佔據此處則賊人來往之
路已絕遜克爾宗一寨必不攻自潰本月十八日

復蒙

聖諭以官兵木城至當噶克一帶賊人來路無難截取

特標

硃筆圈誌發交

臣

等悉心妥酌查遜克爾宗左手當噶

克一處雖溝礮壁立難以繞越而從右手木城繞
進必能堵截其後正在儘力籌辦適與我

皇上指示相符謹將原圖貼說一一進呈再近有小金
川番人郎卡爾結等同婦人二名從前敵脫出並

錄供詞恭呈

御覽奏入

上諭軍機大臣曰繞截賊人後路最為扼要朕前此早已計及即于圖內硃筆標圈詢商阿桂今阿桂于奉諭旨之前所籌派兵襲取路徑與朕意適合足見阿桂之諸事用心現在阿桂已得右手第一寨所有第二三寨亦漸被礮轟殘其第四寨後兩礮均可乘勢攻取如此賊人後路已斷遜克爾宗應必不攻自潰

至於斷賊後路其糧食不能續供賊情自即窘迫但
恐賊寨中或畧有餘糧糲粃等項藉以充饑堅拒然
亦短不能經久阿桂等惟設法堵截勿使賊人得有
接濟必當指日攻取為要又前經傳諭令豐昇額帶
兵往日爾巴當噶與五岱夾攻若能即速攻得則遜
克爾宗之賊更難久留但據脫出小金川番人郎卡
爾結有金川賊人比從前更為害怕凱立葉日爾巴
當噶亦添多人防守之語若豐昇額果往彼攻勦奮

勇之中亦當稍知審慎不可冒昧輕進

同日阿桂豐昇額色布騰巴爾珠爾奏言查番人
瞻顧姻親罔知廉恥是以臣從前聞索諾木納革
布什咱土司之妻曾經札致明亮囑其留心防範
嗣綽斯甲布頭人松乃來營臣詢以霍爾章谷情
形據稱章谷此時正恐見疑何敢認為親戚今臣
再三撥度番情革布什咱土司丹津扎布係已故
土司之堂弟丹津扎布現在代辦土司不免有覬

覲之意此時正欲有以自効冀得立為土司必不肯容逆酋竄經其地而革布什咱已故土司之子即係霍爾爾章谷土司外甥現在撫養其處該土司深願外甥承襲亦斷不敢竟為容隱況番人貪利畏害前此原畏金川克悍是以有意瞻徇今見滅亡左邇可肯為逆刃甫赴之數自取重罪奏入報

聞

同日阿桂豐昇額色布騰巴爾珠爾又奏言臣等

接奉

諭旨令添補官兵皮衣腰刀帳房等項查番地山路崎
嶇不時雨雪兵丁入林穿箐攀越上下衣履極易
于破損而風土苦寒皮衣亦不可少自進勦逆酋
以來各省官兵所須衣履等物或有從各兵家中
自製該營彙齊解赴川省者亦有各營動用公費
代為兵丁製辦解川者並有咨令川省代為就近
購買解營分給所需價值各省解還歸款者每年

製送各一二次不等至各營將領于散給之後造具兵丁花名清冊呈送本省于各兵原營坐餉內按數分季扣還若官弁所借銀兩則于伊等存營俸薪內扣出即時清楚既無碍于

帑項而實有益于官兵從來陝甘雲貴四川各省皆如此辦理未見有持請普發奉餉者以致仰蒙

垂詢至西路楚兵自去秋到營以來該省未經送過軍裝雖于川省製辦馬褂棉襖等物酌量分給而兵

丁較為襪襪是以七月中據湖廣副將李文英等具稟_臣等即檄行川省軍需局借項製辦以供禦寒之用目下天氣漸寒山高雪大陳輝祖所奏解銀購製之項誠所必需_臣等已行知該署督遵照辦理並令文綬仍迅為代辦以副

皇上軫恤深仁至其餘各省官兵所需禦寒衣服雖已製辦但前文綬札知上年甘省所辦羊皮褂三千餘件今尚存貯在省_臣等詢問各營兵丁俱有願

領者是以咨會文綬令其解赴軍營所有價值脚
運仍令各省照例坐扣歸還此際各省官兵實已
無憂凜冽至于各營添補腰刀帳房等項例應于
公費項下動支現在各營內如有帳房實在日久
破爛難以支架者亦照例一體辦理其各兵軍械
臣等不時特派侍衛章京等查點是以損缺者少
惟湖廣省原來之斧鋤本少且不適用凡伐木斫
柴多用腰刀以致亦有殘缺其所請刀仗亦所必

需已行令馬爾邦宜喜凱立葉軍營勘酌照辦奏
入報

聞

同日劉秉恬奏言臣前歲在南路時曾以羊隻搭
放軍糧自達烏軍營驗定之後解赴甲爾木道路
較近是以當時解送四百餘隻僅倒斃三十餘隻
此次由楸砥馳明解往格魯瓦覺道路較遠數倍
且中隔雪山數處先後所解一千餘隻塗次竟倒

斃數百

臣

查此次年月先原議定到營若干始按

數給價若干今既沿途倒斃即照原議數目給價

商販等亦不敢別生希冀然揆之情理未免偏枯

臣

于原議價值之外酌量賞給稍示體恤庶使商

情踴躍不以賠累過多至于裹足至此項羊隻每

一隻議給價銀二兩三錢查軍營定例以羊隻搭

配軍食每羊一隻准米一斗五升計羊二十隻可

抵米三石以現在格魯瓦覺米價計之米三石需

銀四十九兩八錢共羊二十隻只需銀四十六兩
是以羊抵米其價尚屬有減無增奏入報

聞

平定兩金川方畧卷一百六

欽定四庫全書

平定兩金川方畧卷一百七

十月辛巳明亮奏言查大兵從琅谷南下直攻納木迪官寨賊人據住三面放鎗抗拒難以前進必先攻取斯底葉安地方以絕其四面應援之路而斯底葉安又以層層高礮攀附殊難惟北面另起石包地名什扎古上與琅谷相接其下隔以深溝別拖山腿一道東與額爾替隔河相對若從此順

梁而西即與斯底葉安高礪平連官兵便無煩每
層厯礪而上於攻取之勢較為利便但此一道山
腿陡削異常官兵魚貫而登如遇賊番阻截稍有
一人退步即前後各兵擁擠無可存身臣隨挑選
索倫吉林健銳營兵丁配以屯土各兵作為前隊
後揀綠營奮勇官兵緊隨策應十六日丑刻奎林
一路之兵已近礪卡賊即放鎗滾石竭力迎抵我
兵一鼓作氣無不勇敢爭先所有山包上石卡三座

戰碛一座以次搶佔碛內之賊無一得脫其餘各
卡敗退之賊與救援之賊復聚前來為我兵鎗箭
所斃甚多和隆武亦乘勢進兵即攻得琅谷以前
木城一座餘賊竄入碛內抵死據守維時已至己
午之間雖未攻克上面寨落而地勢已得正當起
立木城乃賊復集其羣醜一從斯底葉安而下一
從納木迪而上屢次前衝俱為官兵擊退而扎烏
古山梁復有騎馬賊目三人帶同賊番約三百餘

人蜂擁而至直前鏖戰我兵間有傷損相傳相力復經阿爾都阿蘭保率領索倫吉林各官兵從兩翼抄進殺死賊人幾及大半始各竄去至酉刺連立木城四座其什札古自山包以至山腿亦安設營盤五座將兩處新克地方先為守禦以便別圖進取計此次共殺賊二百餘人官兵內副前鋒參領七朗阿守備王宣均受鎗傷俟查明陣亡受傷各官兵一併咨部伏念納木迪賊寨雖未能剋日

掃除然什扎古山包現經佔據已屬進取有路而賊人力量亦必不能處處防備無難設法攻取奏入

上嘉之

同日富德奏言據駐防馬奈山梁舒明阿等報稱九月十一日夜有賊五千餘人侵擾荊州領催七十所守卡子七十領兵二十名放箭抵禦舒明阿等聞警接應七十見有應援出卡夾攻殺賊四五

名頭被刀傷伊子馬甲卓靈阿奮勇救父中鎗陣
亡官兵益加奮勇賊不能支入林逃竄又十三日
夜據駐劄穆谷之總兵劉輝祖報稱十二日夜有
賊百餘乘霧雨中來擾穆谷西山梁土把總阿甲
所守卡子賊衆一面放鎗一面放砲一面用斧刨
挖碯根將上碯樓阿甲帶兵十餘各放鎗滾石殺
賊甚多天明察看箐林石上血跡甚多此二次我
兵陣亡一人受傷五人

臣謹照例造冊送部查核

奏入

上嘉之

壬午鄂寶奏言查北路糧運情形每日運到卓克
采者雖有多寡不一然較前漸有起色且南路撥
運木池米石據總理知府盛英稟稱陸續運到木
池者現存二千餘石此外尚有已運在途米二千
五百餘石不日亦可運來是大營儲峙儘足供
支惟是目前之接濟固已無虞而後此之運供尤

宜籌計且時屆深秋轉瞬冬令草枯冰結積雪封
山烏拉難以行走此後軍糧南路已難再辦惟冀
北路長短並運方不致有斷絕之虞臣現在極力
督催及時籌辦以期儲備充盈奏入報

聞

甲申文綬奏言現在大兵乘勝深入軍糧甚關緊
要前運未竣後運即須採辦方能接濟裕如今歲
川省秋成原屬豐收但頻歲以來辦米至二百餘

萬石為數繁多又均於附近省城採買民間蓋藏漸少市價日昂未免有妨民食臣與司道等悉心籌酌查下游嘉定瀘川叙州重慶一帶均屬產米之區具通水路應請於此數處再採買米二十萬石按照市價運貯省城聽候撥用雖目下功在垂成自可無須全用而將來大兵凱旋時十餘萬貫兵丁役站夫支用浩繁正可即將此項米石供支即或支用之外尚有餘糧並可補還各屬借用倉

儲缺額之數奏入

上是之

丙戌文綬奏言鑄礮銅觔必須質色純淨川省所產惟樂山縣銅最高榮經縣銅次之其餘各廠銅觔多屬粗雜加工淘淨始能適入今歲准各路軍營咨取淨銅六萬觔臣就近於省城錢局收存揀選樂山榮經兩廠好銅如數趕解軍營收用但軍實所需必當預為儲備查上年四月間經劉秉恬

奏請截留滇銅六萬觔為鑄礮之用久經用竣應
請再於滇省送運京銅內截留十萬觔分貯灌縣
省城二處現今大兵深入或尚須添鑄大礮以資
轟擊則取用充裕如指日凱旋即以撥充寶川局
鼓鑄之用奏入報

聞

同日明亮舒常奏言日內陸續投出番衆經各前
敵押送來營臣等親加提訊咸稱官兵攻打賊酋

抵死守禦以至大小頭人及各寨百姓被殺受傷者極多現在人數日少人心日怯惟於碉外深挖濠溝晝夜堵禦若大兵將達兩圖一帶不論何處打開前途斷不能守等語查賊人自知積惡已深滅亡在即而其畏死倖生之心尚圖力為抗拒藉緩須臾亦屬情所應有臣等前已傳布番人如有望風投順者許以不殺雖在內各番節次脫出而其全局尚未盡散蓋因賊酋賊目以投順

天朝萬無生理之語恐嚇衆心被其迷罔甘為死守不
辭若非設法破其險要自不能因勢利導使之盡
見服從臣等體察現在軍情無不爭思効力速冀
蕩平第念兵以氣勝而賊人聚其死黨爭此要隘
倘以我勇銳各兵驅之鎗石之下冒險撲礮設有
多傷恐欲速反遲轉致未能妥善查東北頭敵以
及西南山腿並木克什下壓之路賊雖并力死據
其地如日旁沙壩等處何嘗不可從此進兵不過

路徑少紆賊以為官兵移動煩難察其設備不甚周密臣等現抽派土練官兵布置已定因恐走漏消息尚未明為宣布飭令整隊以待一俟雨雪少止不拘早晚猝然進攻乘其措手不及悉將日旁溝內寨落焚燒使賊人一時驚疑莫測必將達爾圖等處各番抽往救應臣等仍於東北西南及木克什分為三路進兵而注意於西南山腿倘得一鼓即下則合搗勒烏圍更為捷便至達爾圖軍營

需用糧儲生鉄西路滾運甚見寥寥全恃桂林在
南路不分彼此為之協濟而臬司李世傑經理頗
屬實心近又據報打箭爐撥運米二萬石均已起
發在塗則糧務更形充裕奏入

上諭軍機大臣曰明亮奏設法分掣賊勢以便伺隙進
攻所籌亦好現屆大功將成諸事倍宜慎重自不
可用官兵輕率撲礮致損銳氣惟在明亮等妥酌
而行一有可乘之機即鼓勇直進迅速成功目下

已交冬令天氣日漸晴和正可努力集勛佇盼捷音
上又諭軍機大臣曰明亮等奏達爾圖軍營需用糧儲
生鐵西路各站滾運甚見寥寥等語近據文綬奏達
爾圖軍糧撥過南路協濟米二萬石源源往運足供
三月餘北路軍糧又加數運供有增無減達爾圖軍
糧無虞缺乏是西路所辦達爾圖糧運自應日有起
色至生鉄一項亦據文綬等節次奏稱運供無缺何
以運到者尚屬寥寥著傳諭鄂實將應行趲運之糧

石鉄勛源源接濟毋稍稽悞米糧為軍食所需生鉄為礮子所用均關緊要現在正當乘勝深入尤宜令其寬裕鄂寶務須加意催趲富勒渾文紋亦應上緊供備勿使略有遲違致干重戾

丁亥阿桂豐昇額色布騰巴爾珠爾奏言查遜克爾宗一處係大兵前搗勒烏圍要隘賊人力量全聚於此且見官兵攻圍緊急護死衛巢無所不至希冀擾動官兵一二營卡或可稍緩須臾毋死本

月二十二日子刻有賊三百餘人分為三股來搶遜克爾宗前面官兵礮臺兩邊石卡經侍衛額爾特等督領官兵一百五十餘名出柵奮擊正在攪殺一處而侍衛托爾托保等帶兵從礮臺左手向下應援額森特福康安等又帶兵二百名迅往夾攻烏什哈達等亦帶兵就近抄截官兵三面合攻鎗箭齊發而賊人倚恃坡礮可以遮身敗而復進者數次至寅刻初始踉蹌奔竄官兵尾追趕殺之

直抵賊寨始回查驗殲斃頭人二名又滿洲索倫官兵揀回箭枝內驗有五十三根均帶血痕深淺不等是賊人被殺被傷實為不少再三五日以來遜克爾宗西北相連之第二三碉為礮所擊漸見凋殘臣等復派領隊侍衛將領等帶兵分攻均於二十四日黎明潛進海蘭察比至第二碉寨下賊人擲石發鎗官兵即從鎗石中間直衝而進四面爬越上牆躍入寨內奮力斫殺賊人紛紛遁出又

被牆外官兵截殺逃逸者不及數人即將是寨佔住其額森特至第三寨前督兵亦抵寨下拋入火彈賊人出寨衝壓官兵喜其明來接仗奮力上前鎗箭所施發無不斃惟時海祿所帶埋伏之兵見賊出寨竟與官兵短接遂即帶兵衝下一面乘勢欲搶賊碉一面夾攻賊衆殲斃數人賊番驚駭仍竄回碉死守官兵正在合勢奮攻而榮噶爾博山上之賊望見攻碉緊急惟恐有失隨有數十賊渡

溝而來思襲我兵之後經烏什哈達明仁望見帶
領接應之兵回身迎殺餘賊踉蹌敗遁官兵合力
窮追賊人不能復歸原路敗至溝邊陡礪之上為
我兵所迫眼見跳崖之賊三十餘人久之僅有六
七賊涉水而逸但崖礪高有三四丈其下即河灘
官兵難以追殺而回此次打仗額森特被鎗打折
弓梢又打透弓香弓面續又擦傷無名指中指皮
肉俱被傷之後仍即取親隨之弓連射賊人於帶

兵打仗並無妨礙而官兵亦無不踴躍爭先幾於
旋自為戰惟因第三碉寨究未十分摧塌是以尚
稽得手但屢次斃賊甚多察其情形實屬膽寒氣
沮況此西北寨落四座官兵已克其二僅存三四
兩寨臣等設法籌辦務將此兩寨一併攻獲繞截
賊人後路至近有脫出小金川番人朗木結金川
番人色達爾結及卓克采番人策克納木尼滿朋
均分別安插奏入

上諭軍機大臣曰阿桂等奏稱此次攻寨官兵無不踴躍先登幾於人自為戰甚屬可嘉而海蘭察傷甫平復仍帶兵攻奪堅碉額森特指被擦傷尚換弓連射賊人尤堪嘉獎均著阿桂存記檔冊俟大兵攻得勒烏圍一并叙明奏請交部議叙至談處現在僅存兩碉攻之自不甚費力阿桂又善於調度更可望迅速得手若得此三四兩碉截斷賊人後路遜克爾宗定當不攻自潰佇盼捷音至所訊脫出卓克采番人策

克納木供稱者來金川百姓光景實在害怕并聽說
前日將僧格桑屍首連女人頭人都送出去還不准
降今在卡子上叫喊官兵亦終不應等語所辦尚非
得要前此逆酋狡譎欲以詐降為緩兵之計且以覘
我虛實自應付之不理今衆番既各驚惶畏死正宜
迎機善導竟當令卡上各土兵高聲喊諭將軍等統
領大軍聲罪致討原因索諾木及莎羅奔兄弟負恩
反噬及各頭人肆凶濟惡難以輕宥與爾等衆番無

涉爾衆番人有能明順逆知利害者早釋兵械來赴
軍營投順不但免爾等之死并仍俾爾等完聚安居
從前屢次救出之人已皆如此辦理爾番衆等若有
能將逆酋兄弟及助惡大頭人等擒獻者并當奏聞
重賞如傳布宣諭使衆共知其惶惑當更甚乘隙出
降者多但得衆心渙散則勢自瓦解攻之尤易為力
但不可因用此法稍懈進攻將軍等仍當急速妥為
之又據訊得投出之小金川舊頭人噶里阿讓前日

差噶里三個人由簇拉角克到底木達布朗郭宗曾
頭溝探看情形回來說如今官兵營卡把守甚緊着
來做不出大事只有瑪爾當察納中間河東上噶里
下噶里下處官兵卡子可以搶得阿讓親自帶人定
於二十二日起身由美卧溝往噶里去又索諾木派
頭人摩摩阿什咱德爾什斯甲等商量帶領五十多
人到功噶由擦隆登庫覺巴木過跣水過河到河東
別思滿去放夾壩聞是十九日起身等語此兩番人

所供係十九二十二兩日起身談處相距不遠賊人
不過兩三日即可到彼阿桂前于十六日拜發此摺
今早已到計常青等所駐之地較阿桂更近若賊人
略有滋擾之處常青等自即奏聞或彼謀而未成亦
未可定但既有此言不可不信其有著常青旺保祿
等加意防範搜拏不可稍有玩忽其大板昭一帶亦
緊要後路並著富勒渾郝碩一體嚴密周防勿稍疎

懈

同日阿桂豐昇額色布騰巴爾珠爾又奏言九月二十一日夜子刻有賊三百餘人分為三路來侵木城礮臺經侍衛額爾特等督兵出戰直入賊隊截殺侍衛托爾托保帶兵接應由礮臺左腋衝入并力鏖戰額森特福康安等聞信俱至共相擊殺賊衆被傷甚衆俱經潰散而健銳營前鋒六十三衝入賊中射賊最多甚為勇往吉林烏拉馬甲佟佩射賊箭盡又奪取賊人長槍二人超勇出衆相

應鼓勵臣謹遵

旨將六十三賞戴孔雀翎佟佩賞戴藍翎其餘効力兵
丁酌量賞給銀兩再額爾特勇往無前歷來均能
出力但已係頭等侍衛又曾得巴圖魯名號此次
記其勞績俟再有奮勇之處一并奏

聞奏入

上諭軍機大臣曰阿桂等奏健銳營前鋒六十三吉林
烏拉馬甲佟佩俱超勇出衆甚屬可嘉著加恩將六

十三賞戴孔雀翎外賞給西解特巴圖魯名號佟佩
賞戴藍翎外賞給多布泰巴圖魯名號仍照例賞銀
一百兩巴圖魯頭等侍衛額爾特著阿桂等將此次
勞績記檔俟再有勞績一併具奏朕另降旨加恩

辛卯

上諭軍機大臣曰昨阿桂奏攻勦遜克爾宗右手兩礮
若經攻得即斷賊人後路遜克爾宗之寨當必不攻
自破距今又已三日未識曾否得手盼望殊切今訊

據七圖安堵爾蒙古阿什咱阿拉格魯瓦覺一路若
得遜克爾宗過去就是科斯果木地勢略平到勒烏
圍容易此一路金川人最怕其凱立葉一路山勢亦
險若由此進到噶爾丹寺下碣卡稀少路好走金川
人亦怕官兵由此前進等語是凱立葉一路大有可
望前已降旨令豐昇額帶兵前赴凱立葉通知五岱
夾攻與談番犯所供相合自係極好機會豐昇額曾
否帶兵前往未據奏覆著阿桂豐昇額相商若可進

兵即將何日統兵起程攻勦情形若何迅速覆奏又據綽窩斯甲供勒烏圍雖係金川巢穴但從此過河還有覺則喀拉爾兩處過去纔是噶拉依其覺則喀拉爾山俱陡險恐賊人在彼支拒等語阿桂等不可不知此等情節相機設法妥為辦理以期早奏膚功

壬辰劉秉恬奏言查乾隆三十七年秋冬間舒常帶兵數千名駐扎宜喜彼時兵數無多需糧有限係由南路之打箭爐雇覓番人烏拉從噶爾塔爾

資隆一帶運往木池並未設有臺站至三十八年
春間副將軍豐昇額帶兵由宜喜進攻兵數增添
南路打箭爐長運之米不敷支食經臣會同撫臣
鄂寶奏明照乾隆十三年成例由雜谷一路安臺
轉輸名曰北路彼時原有曾頭溝運糧臺站酌量
增添亦並未另起爐竈現在維州雜谷楸砥卓克
采等處皆北路糧站也臣查北路由省至宜喜較
南路為近而南路由打箭爐至宜喜又較北路為

近南路運糧腳價雖比北路稍多然烏拉馱載一起可到數百石至千餘石較人夫督運可以應急去歲宜喜軍糧腳價雖比路稍多然烏拉馱載一起可到數百石至千餘石較人夫督運亦便捷去歲宜喜軍糧係由南北兩路運供儲備頗充本年春間副將軍豐昇額帶兵改歸凱立葉一路宜喜軍營需糧有限北路各站裁撤人夫糧運亦因而酌減是以副將軍明亮帶兵攻克達爾圖後驟添

官兵數千宜喜軍糧稍形竭蹶維時臣在南路會同桂林奏將運到吉地之米撥運四千石又於打箭爐撥運二千石均雇覓蠻夫烏拉長運木池以資接濟並親帶人夫一千名赴交覺木夾等處以備安站之用嗣後又經桂林及督臣等奏明於打箭爐再撥米一萬四千石運往木池共成二萬之數近接顏希深抄寄摺稿稱南路派撥之二萬石業已運到六千石又有在途之二千五百餘石一

二日內均可運抵木池可供軍營一月之食至北路雜谷一帶糧運臣於八月初一日至楸砥維時到來之米甚少雖經臣奏明趕辦驟運多方設法催趕而道路所限一時未能迅速畢集是以八月內每日只可發北路米數十石接濟沿途口食臣因運到之米漸增遂於九月初四日增至一百數十石昨撫臣鄂寶於初八日到楸砥與督臣富勒渾公同籌議楸砥每日發北路米以二百五十

石為率合之商人長運卓克采之糧每日可有三
百餘石自可不至缺乏再查由楸砥至卓克采共
計十三站每站原設夫四百名本年春間裁撤之
後現在尚未添足是由楸砥發往之米各站不無
停滯臣已咨明鄂寶傳飭糧員招募人夫趲運如
西路續到人夫日內能稍有數餘臣即一併撥往
幫運以期糧運速而軍食裕奏入報

聞

同日劉秉恬又奏言竊查川省糧運自內地派員領價招商雇夫自灌縣等處背負直送楸砭大板昭共計二十三站每站設州縣佐雜等官一員帶夫數百名或一千名接運軍糧及鉛丸火藥銅鉄軍裝等物其運抵軍營之糧名曰滾運亦曰短運督臣文綬於灌縣至大板昭每站另設官一員帶夫一千名及數百名當運軍糧不運別項物件別其名曰大捷站其實與滾運無異雖據承辦之員

稟稱每日運米五百石九月初十以前必可開運
但臣查現在各站之夫尚不敷用茲復另設二十
三站計自灌縣至楸砭共十四站每站議設夫一
千名即需夫一萬四千名再自楸砭至大板昭九
站每站議設夫六百名又需夫五千餘名共需夫
二萬名此二萬名人夫若欲一時自內地派出雖
多給價值原難期其迅速畢集近據承辦大捷站
之同知等稟稱九月十三日開運以來因各站夫

力不齊及連日陰雨負運俱艱是以均勻攤羨每日尚未及二百五十石至楸砥所取大捷站米數每日尚未及二百四十石臣詳加體察必各站員善於經理趕辦妥速均於十月內安設齊全庶可照奏定之數每日運米五百石俟臨時再將實在情形查明具

奏奏入報

聞

同日富德奏言九月二十二日夜有賊四五十人來擾卡汎官兵截斷去路殺賊四名中傷滾崖死者甚衆又二十三日夜有賊百餘人潛從庚額特山梁下窺探穆當噶爾山梁之三碉拋擲火彈兵丁等從火光中望影放鎗賊衆分竄臣查賊衆連次侵擾傷亡不少乃仍冒死潛來則其勢窮力盡已屬顯然臣於二十四日揀選各兵派委章京佛喜於木固庚額特卡卡角深嘉卜等處四路進兵

二十五日乘夜潛至賊卡附近埋伏而令守備李
端帶土兵二十人潛上斯底山頂將近賊碉碉中
犬吠賊衆驚覺即繞下思斷官兵之後正遇藍翎
侍衛阿蘭泰接應上下夾擊賊皆竄入碉內臣等
因將官兵撒下一面令取大小礮位轟擊庚額特
賊碉俟有機會即圖攻取再二十六日投出金川
番民都民錦彭一户五口另繕供詞恭呈

御覽

同日富德又奏言脫出明正番人彥楚木齊里臣
令明正頭人張九錫認識實係談土司之人在斯
第博堵地方打仗受傷被賊擒去並繕供詞恭呈
御覽均奏入

上諭軍機大臣曰據富德奏到脫出金川番民男婦所
供情節番衆等心離膽怯大概可見至其經亭內見
有大蛇訊之綽窩斯甲等供亦相符是皆番衆等滅
亡之兆尤當相機速辦以期迅奏膚功至雅木中齊

立所供霍爾章谷土婦之言云金川賊人探得格魯
瓦覺接遜克爾宗三座營盤之後可以截斷現今每
日打掛如其卦外要去截斷官兵後路又綽斯甲布
一路也要去截斷後路等語訊之綽窩斯甲供今年
八月內商量截斷遜克爾宗後路要從喇穆格羅山
梁由羅博瓦過來如搶得凱立葉大營後路就斷了
因卦不好纔把七圖安堵爾等送出來等語所供雖
不盡同而此等緊要應防之處寧信其有該將軍等

不可不加意防範以期萬全至所供霍爾章谷土婦
並未從索諾木之語如是確實則此土婦尚覺可憫
將來平定金川後自當將其子襲封革布什咱土司
使彼母子完聚以示體卹因訊之綽窩斯甲則稱索
諾木收霍爾章谷的安兒噶沙拉木為小女人衆人
稱為阿什密飲食衣方均索諾木大女人德爾什爾
拉木相同現亦住在噶拉依官寨等語言之鑿鑿自
應不妄而雅木中齊立所供情節頗有可疑如霍爾

章谷土婦既未為索諾木所收何以金川頭人要將雅木中齊立拋河時土婦聞知往索即肯給還又如所言有人看守則索諾木商斷後路之謀何由知詳細其間疑竇甚多然此等語現在無關緊要著富德再向雅木中齊立詰訊明確錄供具奏

癸巳郝碩奏言現在前敵分設兩局鑄造礮位需用一切銅鐵物料倍繁雖現由省局辦解鐵觔及撥運底木達資哩存鐵俱係隨到隨運以供施放

然事關軍火不妨寬為儲備

臣

思色溯普及登古

了口等處今歲春夏攻打之時均曾用礮轟擊其
附近礮卡之處不無遺存礮子隨令各站員曉諭
衆夫於背米之暇留心尋覓每顆酌給工價銀二
錢俟積有成數運交頭敵茲據站員具報尋得三
將軍礮子一千八百二十二顆四將軍礮子一千
零九十六顆已運交前敵施放查三將軍礮子每
顆重十觔四將軍礮子每顆重六觔八兩以現在

揀得礮子二千九百餘顆合計可節省二萬五千
餘觔並不煩開爐鑄造即可應用奏入

上嘉之

平定兩金川方略卷一百七

欽定四庫全書

史部
平定兩金川方略卷一百八十

給事中臣查善長覆勘

總校官原任侍講臣王燕緒

欽定四庫全書

平定兩金川方略卷一百八

十月甲午阿桂豐昇額色布騰巴爾珠爾奏言查
遜克爾宗水碓為賊人緊要之地業經官兵攻克
而賊人未遽潰竄者因遜克爾宗寨落尚有向西
南小山腿下至溝底即係河流路雖較遠而賊人
尚可取水但其小山腿上碓卡為現在所攻之第
三碓寨所隔若不將第三碓寨攻克則不能越過

徑搶小山腿之碉卡仍難以斷其汲飲據脫出之
小金川番人桑卡爾稱賊目山塔爾薩木坦親帶
賊衆在彼抵禦查第三碉寨其大小與遜克爾宗
相等又逼近遜克爾宗賊人鎗石在在可以援應
是以稍覺費力臣等現惟設法奮攻斷其水路奏
入報

聞

同日阿桂豐昇額色布騰巴爾珠爾又奏言查第

三碉寨既可為遜克爾宗官寨右手屏蔽又可以
護小山腿上現在取水之碉故賊人於寨外挖濠
寨內挖窖藏身密布松籤竭力死守而南北兩山
與遜克爾宗官寨內鎗礮又皆互相應援是以攻
取稍難但官兵奪取此處即可往截遜克爾宗之
後且官兵連次搶佔第一第二碉寨士氣奮揚尤
宜乘勢進攻迅圖深入當即于二十七日子刻督
率官兵分隊前進其海蘭察額森特所攻第三碉

寨兩隊之兵潛至碉寨礮下各自埋伏俟至五更突然湧進直逼牆根均將攀援而上賊人見勢危急不避鎗箭林立牆間舍命抵禦官兵隨于牆下壘石為堆乘之以拋火彈而賊仍堅立不動我滿洲索倫兵乘此攢射斃死甚多賊旋遁入寨內于孔穴中放鎗不絕并于牆缺內拋石如雨維時遜克爾宗寨後救援之賊欲來衝突經瑚尼爾圖海祿等奪力擊回天色將明南北兩山之賊施放礮

位均可及官兵隊內而溝內之賊及礮內之賊上
下放鎗合力擊打且又于礮前左右坍塌土石之
內挖成地窖設鎗眼于亂石中間施放不絕連撲
兩次未能得手因令徐徐撤回臣等現在籌辦為
出其不意使賊人猝不及防之計

同日明亮舒常奏言臣等議從日旁沙壩發兵以
期分掣賊勢便于下壓據頭人溫布松乃等稟稱
近來賊人各礮卡內人數更多每夜樹木山坳之

內隱隱有人埋伏日內必有偷放夾壩情事

臣等

密飭各前敵官兵加意防範突有賊衆數十餘人偷劫木克什土兵前卡甫經擊退而西南山腿侍衛蒙固爾所守營盤另有賊衆喊聲並進官兵因係黑夜不便輕動但放鎗排擊賊即寂然遁去迨至黎明賊意官兵守禦或疎復有百餘人潛赴木克什希圖搶奪土兵出卡擊殺追至山半而回次早查看沿途血跡淋漓乃賊人經此懲創並不為

之消沮復于三十日午刻適當臣巡歷各卡之時

于西南山腿望見賊分股各有百餘人一從前敵
迎面而來一從山溝左側而上當即傳令官兵埋
伏以待俟賊近至數步內施用鎗箭而賊亦冒死
上前全無畏縮正與竭力相持而水碓之旁復聚
賊一百餘人猝來掩襲亦經土兵先為準備其時
各路賊人中鎗被箭傷斃紛紛恃其逃走便捷頃
刻四散當將大礮轟摧擊斃亦復不少現侯綽斯

甲布土兵催令派齊即加派官兵往日旁溝內燒其寨落以便于達爾圖等處乘勢下壓使賊人顧彼失此必能一舉成功至達爾圖軍營于前月初二等日非雨即雪與阿桂一路情形不一奉

旨垂詢

臣

等查蠻地氣候本不相同而達爾圖山勢甚

高但有薄霧輕雲雨雪應時立下如覺木交相去不過二十餘里即已陰晴各別寒暖異宜現屆十月初旬已交冬令自可日見暢晴尅期掃盪均奏

入

上諭軍機大臣曰阿桂等奏攻打第三碉尚未能得手甚為可恨至所稱現在籌辦為出其不意使賊人猝不及防等語所奏殊未明晰甚為焦急阿桂或欲出奇密辦不肯預洩固屬慎重之道但叙以入告又復何礙計此旨到軍營所有第三碉自己設法攻得或并遜克爾宗亦已攻取果爾甚善若尚有羈延即將如何出其不意及辦理而未成之處密行具奏又供

內有噶里阿讓欲往布朗郭宗底木達偷放夾壩摩摩
阿什咱得爾什思甲欲往別思滿放夾壩之語前據
朗木結供及已諭常青旺保祿嚴密防守並令富勒
渾一體留心諒亦即有覆奏近日各卡隘防守甚嚴
自不致有貽悞阿桂仍當時刻嚴防勿稍疎懈同日
又據明亮奏稱二十六二十九三十等日賊人于木克
什及西南山腿等處連出侵犯並經官兵勦擊殲賊
甚多賊人自當知所畏懼不敢再為滋擾但歷看賊

番情形遇官兵竭力進攻賊惟糾衆死拒若官兵駐定數日賊即設法竊劫屢試不爽明亮在達爾圖山梁將未得之東北兩碉儘力用礮轟摧或并擊其西南山腿諸卡以期乘勝深入自為得算何以近日尙攻木克什一路著傳諭明亮等相機速辦迅奏膚功副朕懸注

同日

上又諭軍機大臣曰前阿桂奏欲于噶拉依建廟令達

賴喇嘛選擇有梵行大喇嘛往彼居住一款恐日久
金川與西藏睽為一氣亦難保其不滋流弊莫若于
京城選派一人前往聲名似覺更尊已諭知阿桂審
度辦理嗣詢之章嘉胡土克圖據稱金川等處原非
西藏所屬恐不相習至由京派往之胡土克圖與該
處紅教喇嘛支派各別難遽強而相同所言亦是因
思前此德爾格忒白玉寺請赴軍營念經之斯第胡
土克圖大徒弟噶爾瑪噶什等三人曾在兩路軍營

念經阿桂等稱其頗有梵行或于此內擇其最優者在噶拉依新廟居住管束衆喇嘛並可令留住之人來京謁謁承受恩賚潛移默化徐消其兇悍咒詛之邪術似為妥便以此諮之章嘉胡土克圖深以為然著傳諭阿桂將來照此辦理

庚子顏希深奏言查副將軍明亮改由宜喜進攻臣見此路軍糧存貯未裕北路滾運又復無多隨札商臬司李世傑酌撥南路米石以資協濟前後

共撥運米二萬三千石其運到木池交收者已有一萬餘石當八九月間西北兩路糧運均屬拮据而綽斯甲布兵糧不致貽悞者實資南路協濟之力茲接李世傑來札以打箭爐倉存米有限烏拉歸巢在即二萬三千石之外其勢不能再撥臣思南路之協濟既停則此地軍糧惟需恃北路運供北路自樛砥至宜喜約計三千站沿站運夫及丹壩一路駐防官兵通計每日所需口糧須有長短

各運米四百數十石方可無悞供支前接臣鄂寶

來咨每日自楸砥分撥北路米二百五十石臣查

每日運米二百五十石除去三十站背夫口糧每

日到營僅得一百石實屬不敷支用而北路糧運

亦阻雪山不無阻滯是不可不寬裕預籌臣現稟

文綬等請飭催長短各運每日務有四百數十石

由楸砥運至卓克采庶為有備無患而大功垂成

之際亦斷不致有兵糧缺悞之虞再綽斯甲布土

兵所領半年口糧近因其青稞登場偶有將口糧出售者訪其價值大約每石十五六兩不等臣查此路軍糧道險站長北路每石開銷二十三兩有奇南路每石開銷二十兩有奇若將前項口糧就近零星酌買以抵軍糈似于錢糧頗有節省奏入

上諭軍機大臣曰宜喜一路軍糧甚關緊要南路協濟既停北路自應及早籌協著傳諭富勒渾文綬儘力設法催趲長短各運之米每日務足四百餘石之數

以裕軍儲又頗希深奏就近酌買緯斯甲布土兵之米是亦調劑之一法果係專買土兵餘糧于事固屬有益但不可買自官兵致滋流弊至沿塗夫食固不可缺然較軍饗究屬有間今以每日運糧二百五十石而夫糧轉耗去一百五十石未免太多或可照文綬大捷站夫不支正項口糧之例妥辦或酌量本折搭配聽站夫等沿塗自行買食則現運可以稍為樽節于軍食運務均屬有裨著富勒渾文綬一面嚴飭

催運一面與鄂寶顏希深迅速妥酌辦理

辛丑阿桂豐昇額色布騰巴爾珠爾奏言查遜克爾宗正面碉寨賊人已創溝挖窖為併力抗禦之計而其右手相近碉寨今經節次攻取僅存三四兩寨而賊衆悉其力量捨死拒守更屬不遺餘力臣等前于脫出番人詢悉遜克爾宗寨內情形擬令領隊鎮將等先于四五更時直攻正面大碉如其機有可乘固可即時撲進否則佯為撤退而另

派勇敢官兵潛伏于官寨附近可以藏身之處俟前隊撤退各歸本營之後賊人稍懈出其不意復行突然攻撲自可望其攻取其右手第三碉寨一面照舊派兵攻打另派勇銳官兵預備俟攻打官寨與攻打第三碉寨之兵進攻後即突從兩大寨中間直衝而進繞出遜克爾宗官寨之後查官寨後小山腿上雖尚有碉卡但賊人力量必聚于前面其後未必尚有多人而官兵于衝過時雖不免

抵冒鎗石一過此處即已斷其往來之路如此兩
計並行正面官兵一得遜克爾宗官寨其餘碉寨
固必棄之而逃而繞進官兵果能斷其後路則官
寨之賊亦必不攻自潰臣等擬于初四日進攻而
初三日夜即已下雨且自初五初六以至初八大
雪連綿每次積至三四寸六七寸不等及至昨日
稍晴伏思番地秋冬之交本多雨雪如前歲十月
間從甲爾木進兵風雪甚寒至未旬始止去年則

交十月即已快晴雖今年此地雨雪較多但交冬
已有五六日嗣後積雪稍消踏凍可行務在督率
官兵尅期克獲奏入

上諭曰實切盼望之至既定此計一俟天晴勉力為之
同日文綬奏言竊查川省辦理軍需一切供億動
撥

帑金千萬兩不累閭閻惟以跋涉負戴稍資民力致
塵

宸衷頻頒渥澤又荷蒙

特降

恩旨分別減免錢糧現在查議另行核

奏查

臣

等前議川省軍需一切採辦輓運民間自相

幫貼之費先于司庫酌借仍即催解歸款仰荷

恩旨俞允嗣于司庫餘茶等款內酌借在案伏思川省

黎元仰蒙

皇上軫念微勞

恩膏疊沛小民具有天良無不感激

皇仁踴躍趨事頻年以來辦米辦夫給與官價以及安
家口糧爭先趕辦固已惟恐後時祇緣次數稍多
所借官項不能按期完繳新舊並交未免竭蹶目
下大功將成誠如

聖諭軍儲加緊趲運夫役倍多可否仰懇

天恩將民間借項緩俟軍務告竣之後再行催收歸款

奏入

上諭內閣曰川省百姓踴躍奉公趨事恐後甚屬可嘉
目下大功將成尤應多方體卹所有川省民間借用
官項准俟軍務告竣再行收納歸款以紓民力該部
即遵諭行

同日文綬又奏言各省進征官兵裝械俱由成都
分路運送軍營目下已屆冬令口外天寒尤為急
務查湖北湖南兩省兵丁綿衣鞋袴等物共二千
七百餘簍由各本營製解俱先後送抵成都業飭

點驗分路起解其楚兵皮衣經署湖廣督臣陳輝

祖奏明撥借餉銀解川製辦各路軍營有已經咨

送兵冊需製皮衣帽帳房等項者業飭上緊製辦

照數解運查有上年陝甘製辦解川皮衣存貯未

用經臣撥送四千六百件解交將軍阿桂酌給之

外尚存皮衣五千件今照軍營來咨查明需用皮衣

款式與陝省解來皮衣相符者先即飭撥解往以

資禦寒至陝甘雲貴等省軍裝向例由各本省辦

解來川現據解到成都者亦已分路解往此外如
京城滿兵將軍阿桂奏明借給錢糧差官來省製
辦衣裝又荊州滿兵添補衣履帳房及楚省解營
腰刀等項均須由成都分別辦解沿站加夫運送
臣查口內口外各路臺站除滾運軍糧餉銀外現
需趕解銅鐵礮料火繩鉛子等項絡繹不絕而官
兵一應裝械均屬要需無一可緩惟有隨時設法
督飭各站多雇人夫儘力趕運並飭各總理道府

一體查催毋致擁擠遲滯俾士卒早資挾纊以壯
軍容奏入報

聞

壬寅明亮舒常奏言

臣

等前議在日旁進攻以分

賊勢現飭綽斯甲布另派土兵緣此數日以來沿

山積雪未消而濃雲密布朝暮雪下不止以致綽

斯甲布各寨土兵一時未能齊集

臣

等查木克什

一路屢次用兵總以甲索下援之賊在旁牽綴我

軍致難得手而甲索西南相連之馬爾邦列有戰
碉兩座為甲索後路賊人恃以為固若從此攻打
雖非緊要關鍵而出其不意襲破賊碉使逆首疑
為無處不可發兵則達爾圖一帶防守自可漸形
疎懈惟是該處俱係懸崖仄徑陡滑異常必須晝
伏夜行方能成事臣等官兵不諳路徑挑派縛斯
甲布土兵二百五十名革布什咱土兵一百名屯
兵一百名密令千總素國璜等帶領于初五日子

刻前至馬爾邦其兩碉內賊人尚無知覺遂即分
頭圍裏斫門徑進賊人方始驚覺即在碉頂第一
層向下放鎗滾石抵拒各土兵乘勢慌亂勦殺并
將兩碉趕緊拆燬維時甲索一路賊人先已聞聲
而至復有在馬爾邦西南之占經及大壩蜩螂兩
路賊人並來救援各土兵恐驟退被追遂據住要
隘彼此拒戰互有損傷至是日下午方始撤回臣
等當將屯土各兵量為獎賞以示鼓勵其有被鎗

石傷並雪光照眼凍壞脚蹠者委員驗明造冊呈報
計此次屯土官兵因所向獲利受傷又不甚多無
不踴躍情願効力即另行加派土人亦可必其聞
風響應此數日內俟土兵湊數齊全臣等即抽調
壯健兵丁添往日旁協攻務在必克奏入

上嘉之

同日劉秉恬奏言

臣

于九月二十四日自楸砥起

程前往日爾拉一帶查勘該處連日風雪交作人

夫背運維艱過山之米比前減少每日僅有一二
百石最多不過三四百石截至初六七日竟存積
米五千餘石而天氣仍未晴霽臣思連朝陰雪自
當有數日晴和必得乘時加數趕運方可補連日
之缺但聞該站人夫因背米過山冒寒疾病者甚
多而逃亡者亦不少遂于初八日行知附近日爾
拉之三道坪益谷兩站糧員各糾集人夫一千名
乘晴明之期幫運米一千三百餘石臣查日爾拉

山勢本為陡峻氣候更加凜冽自山脚以至山頂
一望皆雪且行至山腰即有非常之風運糧道路
冰雪凝結甚為險滑雖隨時開出階梯不過一半
日一經人跡行走或大雪迷覆仍復掩沒是以運
糧人夫每有冒寒成病並失足跌傷者即如梭洛
柏古番民較之內地民人最為耐寒且善于登山
而初十日派往運米之人亦跌斃二名跌傷一名
番地運糧道路臣處處皆曾經見而西路之巴朗

拉南路之海子山北路之孟拜拉皆係雪山人稱
險峻其情形均不至如此今甫屆初冬即已如此
嗣後若得連月晴霽自可無慮倘遇大雪數次天
氣更寒即不免有阻隔之事西路軍糧現在全取
藉于此且為數較多若不早為計及另籌餉道所
關匪細臣查卓克采別思滿兩處道路均可達谷
噶軍容或由彼處協運或改由彼處轉運似可期
萬全無虞奏入

上諭軍機大臣曰劉秉恬奏日爾拉氣侯過寒風雪甚
大糧運不免阻隔查卓克采別思滿兩處道路俱可
達谷噶軍營或由彼協運或改由彼處轉運等語劉
秉恬所慮甚是日爾拉為楸砥糧站所必經西路軍
糈皆由此轉運不可不預為籌及萬全自當趁晴霽
之日上緊趕運務在多多益善以資儲備富勒渾等
應即飭屬竭力妥辦毋稍懈緩取戾至番地氣候至
冬雨雪每少或可免阻滯之虞但冬雪究係常事萬

一接聯雨雪數日積凍難行背夫跋涉即恐不無艱阻今劉秉恬既稱卓克采別思滿兩處道路均可運通谷噶若能妥酌預籌自屬有備無患著富勒渾即速查此兩路或由彼協運或竟改從彼處轉運之處即與劉秉恬札商妥議一面辦理一面奏聞總期于事有濟勿稍憚煩惜費

癸卯

上諭軍機大臣曰前阿桂等奏為出其不意之計果能

如所籌辦自可即期得手又昨日明亮奏攻奪賊碉並覆查日旁道路情形亦尚未能克期深入兩處軍營俱相持兩月有餘未得迅速克捷深為焦急前此阿桂曾奏若從日爾巴當噶斜上力攻非有現兵五六千不足集事現在不能抽撥必俟攻得遜克爾宗再為酌辦等語日爾巴當噶如果有可進之機自應設法籌辦現在明亮所攻木克什一路不過攻奪一二碉卡仍未能乘勝直進不免耽延時日與其守株

久待何如設法改圖著傳諭阿桂明亮此旨到後如
阿桂已得遜克爾宗明亮亦已由達爾圖山梁直下
固屬甚善設或尚有稽遲則莫若將宜喜現兵抽撥
四五千名令奎林或三寶即行帶領前赴阿桂處與
豐昇額合力馳往日爾巴當噶知會五岱并勢夾擊
可期得利其達爾圖山梁一帶明亮仍統兵在彼照
常攻打牽綴賊勢使之不疑阿桂即與明亮妥速札
商果屬可行即一面辦理一面迅速覆奏

臣等謹案遼克爾宗峰巒特起為賊衆緊要屏障悉力死守不遺餘力大兵屢次進攻未經得手是以擬於日爾巴當嚙進攻第乘隙搗虛需兵不少而山勢綿長在在須兵駐守抽撤非易尚不免遲疑觀望乃蒙

皇上燭照先幾并令宜喜抽兵四五千名前往合力

臣

阿桂等得所稟承因決計直搗中堅一面接通凱立葉大營一面壓至河邊截斷穆爾津岡後

路而遜克爾宗自歸掌握風馳霆擊頃刻開通
何莫非

聖明指示也

甲辰

上諭軍機大臣曰阿桂處解到小金川頭目緯窩斯甲
據供情願發往軍營効力併招降番衆其言雖不足
深信然留于此地亦無所用著阿彌達五格將緯窩
斯甲解往軍營若解到軍營時已攻得遜克爾宗進

攻勒烏圍擒獲索諾木著阿彌達仍將綽窩斯甲解
京否則令其効力招降如綽窩斯甲到彼並未肯出
力轉或洩我軍情即著于軍前正法毋使脫逃

是日

上賞阿桂元狐帽一頂貂馬褂一襲豐昇額明亮色布
騰巴爾珠爾元狐帽各一頂貂馬褂各一襲富德元
狐帽一頂舒常貂尾帽一頂海蘭察額森特貂尾帽
各一頂捨猓獺馬褂各一襲奎林元狐帽一頂捨猓

獠馬褂一襲和隆武三寶捨獠獠馬褂各一襲

丁未富德奏言

臣

于十五日將二將軍礮摧燬噶

咱布拉木賊碉定于二十一日夜分調官兵一路
由河北攻取森得爾瓦谷穆當噶爾等處一路攻
奪河南噶咱布拉木地方以分賊勢奏入

上諭軍機大臣曰前據阿桂初十日所奏之摺稱現在
設法攻勦遜克爾宗一俟天氣晴霽即可進取此數
百里內天時大約相同富德軍營十四五等日既連

晴霽阿桂處諒亦相同自應即趁天晴乘機攻打如
能于十四五等日攻得日內亦應奏至佇盼捷音現
今日屆仲冬以番地情形而論向後晴日較多必須
上緊籌辦迅成大功雖不宜急遽撲礮亦不可過于
遲緩

平定兩金川方略卷一百八